


五家正宗贊



漢書門	
類	二八〇〇
號	七八
函	三〇
架	〇四
冊	一六

內閣文庫	
漢書	二八〇〇
類	七八
號	三〇
架	〇四
冊	一六

釋家

內閣文庫	
番號	漢 10028
冊數	4 (1)
函號	310 126

310-126



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



希叟和尚正宗

贊目錄

六庫

菩提達磨大師

六祖大鑑禪師

江西馬祖禪師

南嶽石頭禪師

南泉願禪師

百丈大智禪師

趙州真際禪師

黃蘗斷際禪師

睦州陳尊宿

德山見性禪師


巖頭叅禪師

雪峯真覺禪師

臨濟宗

臨濟慧照

興化獎禪師



南院顯禪師

風穴沼禪師

首山念禪師

汾陽昭禪師

葉縣省禪師

浮山圓鑒禪師

慈明圓禪師

揚岐會禪師

黃龍南禪師

寶覺心禪師

白雲端禪師

保寧勇禪師

真淨文禪師

五祖演禪師

圓悟勤禪師

南堂靜禪師

佛鑑勤禪師

佛眼遠禪師

大慧杲禪師

虎丘隆禪師

應庵華禪師

卍菴顏禪師

懶菴需禪師

密菴傑禪師

曹洞宗

洞山悟本禪師

曹山元證禪師

雲居宏覺禪師

同安丕禪師

同安志禪師

梁山觀禪師

大陽玄禪師

投子青禪師

芙蓉楷禪師

丹霞淳禪師

真歇了禪師

宏智覺禪師

天童珙禪師

自得暉禪師

雲門宗

雲門匡真禪師

香林遠禪師

洞山初禪師

智門祚禪師

雪竇明覺禪師

洞山聰禪師

雲居舜禪師

大覺璉禪師

天衣懷禪師

圓照本禪師

圓通秀禪師

大通本禪師

雪峯慧禪師

月堂昌禪師

瀉仰宗

瀉山大圓禪師

仰山智通禪師

南塔湧禪師

芭蕉清禪師

芭蕉徹禪師

法眼宗

清涼法眼禪師

天台韶國師

永明智覺禪師

五家正宗贊并序

游聖人之門者難爲言此特闈門兒女子軟
紅輕襪踏地怕痛之論又烏足爲參學法衲
僧家千聖頂顛瞥轉玄樞翻鐵面皮爺也不
識示一機如大火聚出一言如生鐵橛無你
近傍處無你咬嚼處針砭古今活必死疾又
何聖可稱何門可游何言可忌終日言而盡
道言滿天下無口過或廢或貶或抑或擣由
盡其奧廢非勸節貶非窮鄉抑非叅人揚非

舉善息黥補劓截鶴續鳧倒用橫施著著有
出身之路肯桎梏籠檻分甘爲淺丈夫試愚
生也魯瘦藤挑月破笠包雲奔走江湖幾五
十載雖透關眼未甚明至理言未甚的然於
古人不恰好處略窺涯涘試將五彩黼黻太
虛似不量其力也前謂褒貶抑揚當俟金錕
刮膜出語驚群者重爲點發雖然翠巖眉毛
寧免拖地 寶祐甲寅西蜀比丘紹曇百
拜書于靈鷲放山室

初祖菩提達磨大師

師南印度香至王之子姓刹帝利本名菩提
多羅因二十七祖般若多羅尊者行化至本
國其王施無價寶珠時王有三子尊者欲試
其所以所施珠問三王子曰此珠圓明有
能及此否師曰此是世寶未足爲上於諸寶
中法寶爲上此是世光未足爲上於諸光中
智光爲上此是世明未足爲上於諸明中心
明爲上此珠光明不能自照要假智光光辨

於此既辨此已即知是珠既知是珠即明其
寶若明其寶寶不自寶若辨其珠珠不自珠
珠不自珠者要假智珠而辨世珠寶不自寶
者要假智寶以明法寶然則師有其道其寶
即現衆生有道心寶亦然尊者歎其辯慧改
號菩提達磨及香至厭世之後遂出家矣師
降六宗一曰有相二曰無相三曰定慧四曰
戒行五曰無得六曰寂靜後值異見王輕毀
三寶有弟子宗勝潛至王所廣說法要往返

徵詰師懸知宗勝義墮遽告波羅提曰汝可
速救羅提稟云願假神力言已雲生足下至
王前默然而住時王正問宗勝忽見羅提乘
雲而至愕然忘其問荅曰乘空之者是正是
邪荅曰我非邪正而來正邪王心若正我無
邪正王雖驚異而慢心方熾即擯宗勝令出
羅提曰王既有道何擯沙門我雖無解願王
致問王怒而問曰何者是佛荅曰見性是佛
王曰師見性不荅曰我見佛性王曰性在何

處荅曰性在作用王曰是何作用我今不見
荅曰今見作用王自不見王曰於我有不荅
曰王若作用無有不是王若不用體亦難見
王曰若當用時幾處出現荅曰若出現時當
有其八主曰其八出現當爲我說羅提說偈
曰在胎爲身處世爲人在眼曰見在耳曰聞
在鼻辨香在口談論在手執捉在足運奔遍
現俱該沙界收攝在一微塵識者知是佛性
不識喚作精魂王聞偈已心即開悟乃悔謝

前非咨詢法要師一日曰吾觀赤縣神州有
大根器遂踰海越漠爲法求人初至見梁武
帝帝問如何是聖諦第一義師曰廓然無聖
帝曰對朕者誰師曰不識帝不契遂折蘆渡
江至少林面壁九年得二祖於深雪中曾謂
曰外息諸緣內心無喘心如墻壁可以入道
後傳衣付偈曰吾本來茲土傳法救迷情一
花開五葉結果自然成流支光統數加繁害
至第六度遂不救識曰江槎分玉浪管炬開

金鎖五口相共行九十無彼我師知緣盡欲
返天竺令弟子各言其志道副得皮摠持得
肉道育得骨二祖得髓師入滅後葬于熊耳
後宋雲使西域還遇師於葱嶺見師手携隻
履而返歸葵帝開壙果見空棺隻履存焉

贊曰 隆準龍顏 碧瞳天相

棄金輪爲聖道出家

辨寶珠與阿師相抗

足生雲 驅弟子除異見之邪

舌翻瀾 聽合國起六宗之謗

神泐赤縣接大乘根

東土西天示衲僧樣

廓然無聖 逆龍鱗一葦橫江

寂尔觀心 坐鬼窟九年摸象

一花開五葉 放庭雪没人腰

毒藥作醍醐 笑江槎分玉浪

如牆如壁 幾曾當教外別傳

分髓分皮 正好喫手中痛棒

詐死忙携隻履歸惜大唐國一時人開眼被
胡兒欺誑

曹溪六祖大鑑禪師

師諱慧能新州人俗姓盧家貧樵采以給一
日負樵至市聞客誦金剛經至應無所住而
生其心處悚然問客曰此何法也得於何人
客曰此名金剛經得於黃梅恐大師師遂白
其母至黃梅謁五祖祖曰汝自何來曰嶺南
祖曰欲須何事曰惟求作佛祖曰嶺南人無

佛性若爲作佛曰人有南北佛性豈然祖異
之乃曰著槽廠去師禮而退遂負石舂米後
聞人舉北秀頌曰身似菩提樹心如明鏡臺
時時勤拂拭莫使惹塵埃師即倩人書偈其
傍曰菩提本無樹明鏡亦非臺本來無一物
何處惹塵埃祖因付衣鉢潛至大庾嶺明上
座逐之師以衣置於石上曰此衣表信可力
爭耶明曰我來求法非爲衣也師曰不思善
不思惡正恁麼時如何是明上座父母未生

以前本來面目明大悟師於儀鳳元年丙子
正月八日居南海遇印宗法師於法性寺講
經聞二僧辨風幡一云風動一云幡動爭之
不已師曰可容俗流輒預高論否直以風幡
非動動自心耳印宗聞之遂與披剃韶州刺
史韋據請於大梵寺轉法輪并受無相心地
戒門人紀錄目爲壇經南嶽讓和尚因嵩山
安和尚啓發之乃直詣參師師問曰什麼處
來岳曰嵩山來師曰什麼物怎麼來曰說似

一物即不中師曰還假修證否曰修證即不
無汚染即不得師曰即此不汚染諸佛之所
護念汝既如是吾亦如是青原和尚參師問
曰當何所務即不落階級師曰汝曾作什麼
來原曰聖諦亦不爲師曰落何階級原曰聖
諦尚不爲何階級之有師深肯之師將順寐
欲往新州衆曰師從此去早晚却回師曰葉
落歸根來時無口又說偈曰心地含諸種普
雨悉皆生頓悟花情已菩提果自成

贊曰 震且心宗 嶺南蠻種

一字不識書 採薪勤母奉

黃梅確頭和糠搗出 石墜覺腰輕

新州市上平地擲翻 擔折知柴重

鱷魚眼睛光轉轉 嗔明上座爲衣鉢爭

毒蛇口氣冷冰冰 斥印宗僧非風幡動

汚染即不得 蕩南嶽家財一物無

聖諦尚不爲 鼓青原波浪千尋湧

開作家爐鞴 村獾獠奴幾塊精金

說成快壇經 臭皮囊盛許多骨董

葉落歸根來時無口 死歎難翻

地含諸種普雨皆生 開眼說夢

千古曹溪鏡樣清非劈箭截流機浸殺底堪

作何用

江西馬祖禪師

師諱道一漢州什邡人姓馬氏容兒奇異虎
視牛行得法南岳後歸蜀鄉人喧迎之溪邊
婆子云將謂有何奇特元是馬鞍箕家小子

師遂曰勸君莫還鄉還鄉道不成溪邊老婆
子喚我舊時名再返江西西天二十七祖般
若多羅識云金鷄解銜一粒粟供養十方羅
漢僧六祖謂南嶽云尔後出一馬駒踏殺天
不人去在石鞏爲獵時從師菴前過師見問
曰汝是何人曰獵者師曰汝解射不曰解射
師曰汝一箭射幾箇曰一箭射一箇師曰汝
不解射曰和尚解射不師曰解射曰一箭射
幾箇師曰一箭射一群曰彼此生命何用射

他一群師曰汝旣知如是何不自射曰若教
某甲自射直是無下手處師曰者漢曠劫無
明一時頰息輦遂擲弓箭投師出家師與百
丈行次見水鴨師問水鴨子在何處丈曰飛
過去也師遂捏丈鼻丈作痛聲師曰又道飛
過去也丈乃有省遂歸寮中大哭同事問曰
有何事丈曰汝去問和尚同事往方丈問曰
不知海侍者有何事而哭令某甲來問和尚
師曰汝自去問他同事歸問丈大笑同事曰

適來哭而今笑文曰適來哭而今笑龐居士
參次問云不與萬法爲侶者是什麼人師云
待汝一口吸盡西江水即向汝道士於此有
省師與百丈南泉智藏翫月次師曰正恁麼
時如何藏曰正好修行丈曰正好供養南泉
拂袖便行師曰經歸藏禪歸海唯有普願獨
超物外後示寂于泐潭
贊曰 虎視牛行 虬髯鐵面
滅菩提達磨之心宗

應般若多羅之懸識

金雞解銜一粒粟 禍孽潛萌

馬駒踏殺天下人 惡聲難掩

射鹿印石鞞無明蕩除

過鴨將百丈鼻頭捏轉

吸江口 壑殺龐公

翫月機 坑埋普願

八十四人阿轆轤 成團如破驢脊上蒼蠅

七千餘里走區區 被人喚馬鞞箕家小团

赤手逗曹溪正脉 古今分宗洵滔滔
即心得臨濟克家 兒孫上傳燈袞袞
誓首真空大法王蕩蕩乎民無得而稱焉擬
覓踪由太虛閃電

南嶽石頭禪師

師嗣青原諱希遷端州人姓陳氏在俗時每
厭鄉洞民多淫祀輒奪牛毀祠而歸鄉老不
能禁師參青原原令馳書與南嶽曰汝達書
了速回吾有箇鋤斧子與汝生山去師至彼

未呈書便問不慕諸聖不重已靈時如何讓
日子問太高生何不向下問師曰寧可永劫
沈淪不求諸聖解脫讓便休師曰原問日子
去未久送書達不師曰信亦不通書亦不達
去時蒙和尚許箇鋤斧子便請原垂一足師
禮拜異日問曹溪大師還識和尚否原曰汝
還識吾否師曰識又爭能識原曰衆角雖多
一麟足矣師一日夢與六祖乘一龜游沫深
池覺原之曰靈龜智也池聖海也吾與祖師

同乘靈智游於聖海也師天寶間之衡山南
寺之東有石狀如臺乃結菴其上時號石頭
和尚鄧隱峯辟馬祖祖問甚處去峯曰石頭
去祖曰石頭路滑峯曰竿木隨身逢揚作戲
便行到師處繞禪床一匝振錫一下乃問是
何宗旨師曰蒼天蒼天峯無語却回舉似祖
祖曰更去問待他有答汝便噓兩聲峯再去
如前問師噓兩聲峯又無語回舉似祖祖云
向汝道石頭路滑藥山一日在石上坐師見

問曰汝在者裏作什麼山曰一物不爲師曰
恁麼則閑坐也山曰閑坐卽爲也師曰汝道
不爲不爲箇什麼山曰千聖亦不識師乃以
偈歎之曰從來共住不知名任運相將只麼
行自古賢猶不識造次之流豈可明僧問如
何是禪荅曰碌磚如何是道荅曰木頭師著
參同契草菴歌行於世

贊曰

端州生緣

曹溪得度

鱉鼻蛇毒要傷人

破鏡烏心專食母

厭洞民多淫祀 毀叢祠奪牛歸
與嶽僧通信書 挾鋤斧生山去

衆角雖多一麟足 又爭能識得青原

深池同載一龜游 竟何曾夢見六祖

臨機多滑路 推隱峯束手墮懸崖

共住不知名 對藥山熟睡饒譚語

貼身死計 磐石坐生雲

信口答禪 碌磚拖似雨

青松下閑謳一曲 草庵歌不落宮商

亂山中狂叫數聲 參同契是何言句

惜曹溪旁出一枝到情忘義斷時生五逆孫
繼不孝子

南泉願禪師

師諱普願鄭州人姓王氏初見馬祖契悟後
住南泉上堂曰王老師自少養一頭水牯牛
擬向溪東牧不免食他國王水草擬向溪西
牧亦不免食他國王水草不如隨分納些些
揔不見得山下有一菴主人謂曰近日南泉

和尚出世何不去禮拜曰非但南泉出世直
饒千佛出興我亦不去師聞乃令趙州去勸
州去便設禮主不顧州從西過東從東過西
主亦不顧州曰草賊大敗遂拽下藤子便歸
舉似師師曰我從來疑著者漢師一日到莊
莊主預備油糞迎奉師曰老僧居常出入不
與人知何得排辦如此主曰昨夜土地報道
和尚今日來師曰王老師修行無力被鬼神
覷見時有僧問既是大善知識爲什麼却波

鬼神覷見師曰土地前更下一分飯一日兩
堂首座爭貓兒來白師師持刀提起貓兒曰
道得即救取貓兒道不得即斬却二俱無對
師便斬之至晚趙州自外歸師舉前話示之
趙州脫鞋安頭上便出師曰子若在救得貓
兒示衆曰王老師賣身去也阿誰買時有僧
出衆曰某甲買師曰不作貴不作賤汝作麼
生買僧無對僧問師居丈室將何指南師曰
昨夜三更失却牛天明起來失却火師在山

作務次僧問南泉路向甚處去師拈起鎌子云我者鎌子三十錢買得僧曰不問茅鎌子南泉路向甚處去師曰我使得正快陸亘大夫與人雙陸次見師陸指骰子曰恁麼不恁麼信彩去時如何師拈起骰子云臭骨頭十八陸又問弟子家中有一片石或時坐或時臥如今擬鑄作佛得不師曰得陸曰莫不得不師曰不得師住菴時一僧到師向道我上山作務待齋時作飯自喫了送一分上來少

時其僧自作喫了一時打破家生就師床卧師待不來歸見僧牀上卧師亦就邊卧僧便起去師後曰我往前生菴時有箇伶俐道者至今不見消息陸亘一日向師道肇法師也奇恠解道天地與我同根萬物與我一體師指庭前花曰大夫時人見此一株花如夢相似陸罔測師問座主曰與我講經得麼座曰某甲與和尚講經和尚與某甲說禪始得師曰不可將金彈子博銀彈子去上堂曰諸和

尚子王老師十八上解作活計如今有解作
活計者麼出來共汝商量也須是住山人始
得良久顧視大眾合掌曰珍重無事各自修
行一日廿贄行者來設粥云請和尚念誦師
云耳贄行者設粥請大眾爲狸奴白牯念摩
訶般若波羅蜜贄禮拜便出去師到厨內打
破鍋子

贊曰 咄這王老師 遍地栽荆棘
牧牯牛東西溪上 索頭在手未會放收

斬貓兒上下堂前 暗地絝繩難分曲直
亂拋骰子 臭骨頭十八點喝成
錯指路頭 茅鎌子三十錢買得

不作貴不作賤 賣渾身誰肯商量
失却火失却牛 居丈室有何奇特
被鬼神覷見了 莊上喫片油糍
與趙州相見來 鎮州出大蘿蔔

一株花如夢相似 孰云天地同根
十八歲活計做成 難使兒孫取則

許陸亘開鑄坐石 逐惡隨邪

爲甘贄打破粥鍋 開門放賊

佛出世亦不去 整頭庵主未免狐疑

飯飽後恣嗜眠 靈利道者不知消息

將金彈子換銀彈子長處無多硬要做阿轆
轆善知識

百丈大智禪師

師嗣馬祖諱懷海福州人姓王氏師再參祖
侍立次祖目視繩床角拂子師曰即此用離

此用祖曰汝向後開兩片皮將何爲人師取
拂子豎起祖曰即此用離此用師掛拂子舊
處祖震威一喝師便禮拜後檀信請於洪州
新吳界住大雄山居處巖巒峻峻故號百丈
師處之末期月參玄之士四方羣集瀉山黃
蘗當其首一日師謂衆曰佛法不是小事老
僧昔被馬大師一喝直得三日耳聾黃蘗聞
不覺吐舌師曰子已後莫承嗣馬祖去麼蘗
云不然今日因和尚舉得見馬祖大機大用

然且不識馬祖若嗣馬祖已後喪我兒孫師
曰見與師齊戒師半德見過於師方堪傳授
子甚有超師之見藥便禮拜師每上堂有一
老人隨衆聽法一日衆退唯老人不去師問
汝是何人老曰某非人也於過去迦葉佛時
曾住此山因學人問大修行人還落因果也
無某云不落因果遂五百生墮野狐身今請
和尚代一轉貴脫野狐身師曰你問老曰大
修行人還落因果也無師曰不昧因果老於

言下大悟作禮曰某已脫野狐身住在山後
敢乞依亡僧津送師令維那白槌告衆食後
送亡僧食後師領衆至山後巖下以杖挑出
一死狐乃依法火葬司馬頭陀自湖南來見
師云瀟山奇絕可聚千五百衆師曰老僧欲
住可乎陀云非和尚所住師曰何也陀曰和
尚是骨人彼是肉山設居之徒不盈千師曰
吾衆中莫有人住得不陀曰待歷觀之師令
侍者喚第一座來師曰此人如何陀令擊欵

行數步曰此人不可又令喚典座來陀曰此
正是瀉山主也師是夜召祐入室囑曰吾化
緣在此瀉山勝境汝當居之嗣續吾宗廣度
後學時華林聞之曰某甲忝居上首祐公何
得生持師曰若能對衆下得一轉語出格當
與住持即指淨瓶問曰不得喚作淨瓶汝喚
作什麼華曰不可喚作木椀師不肯乃問祐
祐踢倒淨瓶師咲云第一座翰却山子也祐
遂往焉師作清規

贊曰 出格胚暉 鈞陶巧匠

瘦骨稜稜玉削成 碧眸罔罔星流樣

脫野狐不昧因果 知歷代贊幾何罵幾何

闢水鴨落盡便宜 走歸家哭一上笑一上

淨瓶踢倒 放山子荷鑿入千峯

拂子拈來 恠馬師平地埋青嶂

一生鼻頭痛 刻骨冤不易消融

三日耳朵聾 入心毒卒難洗蕩

共游惡業蛟龍窟 子黃蘗友龐公

同奪生獐虎兕胎 兄南泉弟知藏

清規井井 深掘陷人坑

華冒繩繩 密布縵天網

策竒勛不戒叔孫通與老臊胡作萬古城池
阿誰近傍

趙州真際禪師

師嗣南泉諱從諗曹州人姓郝氏一日問南
泉曰如何是道泉曰平常心是道師曰還可
趣向也無曰擬向即乖師曰不擬爭知是道

曰道不屬知不屬不知知是妄覺不知是無
紀若真達不疑之道猶如太虛廓然虛豁豈
可強是非耶師於言下悟理有僧游五臺問
婆子曰臺山路向甚處去婆曰驀直去僧便
去婆曰好箇師僧又恁麼去後僧舉似師師
曰待我去勘破明日便去問臺山路向甚處
去婆曰驀直去師便去婆曰好箇師僧又恁
麼去師歸謂僧曰臺山婆子爲汝勘破了也
僧問久響趙州石橋到來只見略約師曰汝

只見略約不見石橋曰如何是石橋師曰度
驢度馬一日真定師王公携諸子入院師坐而
問曰大王會麼王曰不會師曰自小持齋身
已老見人無力下禪床王尤加禮重僧問狗
子還有佛性也無師曰無僧云一切衆生皆有
佛性狗子因甚却無師曰爲伊有業識在師
到黃蘗檠見來便閉方丈門師乃把火於法
堂叫云救火救火檠開門捉住曰道道師曰
賊過後張弓到茱萸執主丈法堂上從東過

西萸曰作什麼師曰探水萸曰我者裏一滴
也無探箇什麼師以丈倚壁便行僧問如何
是祖師西來意師曰庭前栢樹子後法眼問
覺鐵蒲聞趙州有栢樹子話是否覺曰先師
無此語莫謗先師好僧問雪峯古澗寒泉時
如何峯曰瞪目不見底曰飲者如何曰不從
口入師聞曰不可從鼻孔裏入僧便問古澗
寒泉時如何師曰苦曰飲者如何曰死僧舉
似雪峯峯遙望作禮曰趙州古佛從此不答

話嚴陽問一物不將來時如何師曰放下著
曰既是一物不將來放下箇什麼曰放不下
擔取去嚴有省

贊曰 禪在口皮邊 換盡衲僧眼

中南泉毒 太虛寥廓豈強是非

死雪峯心 古澗寒泉分明剖判

見大王不下床接 表吾宗尊法有人

勘庵主拽下藤歸 知王老疑著者漢

菜萁探水 靠丈立生根

黃蘗救焚 開門驚落膽

狗子無佛性 露刃劒冷燄含霜

臺山勘破婆 葛藤椿一刀截斷

覺鐵嘴謂先師無此語 費口分踈

嚴尊者問一物不將來 全肩荷擔

架略約非惟度馬度驢且百世接沈迷使平

步摩訶衍岸

黃蘗斷際禪師

師嗣百丈諱希運閩人初游天台逢一僧與

之言笑如舊識熟視之日光射人乃偕行澗
水暴漲植杖而止其僧牽師同度師曰兄自
度彼即褰衣躡足履波如地回顧師曰渡來
渡來師咄曰者自了漢吾早知當斫汝脛僧
嘆曰真大乘法器我所不及言訖不見百丈
一日問師甚處去來師曰大雄山下采茵子
來丈曰還見大虫麼師便作虎聲丈拈斧作
斫勢師打丈一搥丈吟吟而笑便歸上堂曰
大雄山下有一大虫汝等諸人也須好看百

丈老漢今日親遭一口師在南泉作首座一
日持鉢向南泉位坐泉入堂見謂師曰首座
幾時行道師曰威音已前泉云猶是王老師
兒孫在師遂過第二位師辭泉門送提起師
筮曰長老身材沒量大筮子太小生師曰雖
然大千世界揔在裏許泉曰王老師嚙師戴
筮便行師在壩官殿上禮佛次時唐宣宗爲
沙彌問云不著佛求不著法求不著僧求長
老禮拜當何所爲師曰不著佛求不著法求

不著僧求常禮如是事彌曰用禮奚爲師掌
彌彌曰太麤生師曰者裏是什麼所在說廉
說細隨後又掌及宗即位乃封爲廉行沙門
裴相國諫之曰三掌爲陛下斷三際易爲斷
際師曾有六人勅到五人作禮中有一人提
起坐具作一圓相師曰我聞有一隻獵犬甚
惡僧曰尋羚羊聲來師曰羚羊無聲到你尋
僧曰尋羚羊跡來師曰羚羊無跡到你尋曰
尋羚羊蹤來曰羚羊無蹤到你尋曰怎麼則

死羚羊也師便休去明日陞堂曰昨日尋羚羊
僧出來僧便出師曰昨日公案未了老僧
休去你作麼生僧無語師曰將謂是本色衲
子元來是義學沙門打出示衆云汝等諸人
盡是噎酒糟漢恁麼行腳何處有今日還知
大唐國裏無禪師麼時有僧出云只如諸方
匡徒領衆又作麼生師曰不道無禪只是無
師師俗居貧母老聞師住黃蘗特來相見師
不顧母爲飢寒至大義渡頭失腳擲死後果

生大夢師曰我當時若受汝一粒米當墮地
獄寧有今日再拜而去師一日捏拳云天下
老和尚揔在者裡我若放一線道從汝七縱
八橫若不放過不消一捏問不消一捏時如
何師曰普裴相國捧一尊佛跪前曰請師安
名師喚曰裴休休曰諾師曰與汝安名竟千
頃南參師師曰未現三界影像時如何南曰
即今豈是有耶師曰有無且置即今如何南
曰非古今師曰吾之法眼已在汝躬師曰且

當人事宜不能體會得但知學言語向皮袋
裏安著到處稱我會禪還替得生死麼輕忽
老宿入地獄如箭

贊曰 麤行沙門 略無拘檢

掌大唐天子 面似血紅

打臨濟廝兒 棒如雨點

大雄山下突出虎 未具爪牙

大義渡頭擲殺娘 不分恩怨

在威音已前行道爭坐位 平地喫交

聞百丈三日耳聾驚吐舌 和根翻轉

羚羊絕蹤跡 軒知獵犬難尋

澗水漲波濤 却被胡僧欺騙

小笠藏大千世界 甚處著王老師

兼拳捏天下師僧 有時通一絲線

謂千頃南法眼在汝 剛要鬼分賊

與裴相國古佛安名 白遭渠汚染

噎酒糟漢還知大唐國裏無禪師 廢輕忽老

僧入地獄如箭

睦州陳尊宿

師諱道蹤俗姓陳江南李主之裔因游開元
寺禮佛見僧如故歸白父母願求出家許之
受具游方契旨於黃蘗後爲四衆請住觀音
寺常百餘衆學者咨扣隨問遽答詞語峻嶮
無以嬰其鋒由是諸方以尊宿稱之嘗首座
黃蘗時臨濟方入衆師目爲大器指見蘗問
佛法大旨蘗三度賜棒雲門初參師師宿門
拶折雲腳乃云秦時轆轤鑽雲大悟仍指見

雪峯師後歸開元以母老無親奉居閑房日
織蒲鞋鬻米供奉故號陳蒲鞋巢寇至境師
標大履於城門巢盡力不能舉歎曰睦州有
大聖人舍城而去遂免擾師問座主講什麼
經曰涅槃經曰問一段義得麼曰得師以腳
踢空中吹一吹曰是什麼義曰經中無此義
曰脫空謾語漢五百力士揭石義却道無有
一秀才訪師稱會二十四家書師以拄丈空
中點一點曰會麼才罔測曰又道會二十四

家書永字八法也不識僧參次師問汝是新
到否曰是曰且放下葛藤會麼曰不會曰擔
枷陳狀自領出去僧便去師曰來來我實問
汝其處來曰江西師曰泐潭和尚在汝背後
怕你亂道見麼僧無語師應機多云擔板漢
門牆嶮峻少有許可後接陳操尚書一人
贊曰 者漢一生擔板 肯被它人移換

斷佛祖命脉 不假鋤刀

換衲僧眼睛 只消泥彈

指臨濟參黃蘗 生蛇入竹筒

接雲門嗣雪峯 烏龜生鵠卵

五百力士揭石義 將脚尖虛處踢翻

二十四家破體書 以主丈空中點看

叱新到放下江西爛葛藤

沒巴鼻拋出秦時轆轤鑽

閑房養母 破蒲鞋能直幾文錢

古寺截身 潑家私當甚破漆椀

當門懸大履 虛得聖人名

分座振頰綱 瞎却人天眼

氣衝牛斗薄諸方 將死雀就地彈用盡機關
末後只接得箇俗漢

德山見性禪師

師諱宣鑑嗣龍潭簡州人姓周氏初講金剛
經名冠成都時稱周金剛嘗與同學曰一毛
吞海海性無虧纖芥投針鋒利不動學與無
學惟我知焉聞南方禪席頗盛師氣不平乃
日出家兒千劫學佛細行萬劫學佛威儀不

得成佛南方魔子敢言直指人心見性成佛
當破其窟宅滅其種類以報佛恩遂負青龍
鈔出蜀至澧陽路上見一婆子賣餅因息肩
買點心婆指擔曰者是什麼文字曰青龍疏
鈔曰講何經曰金剛經曰我有一問若答得
即與點心若不得且別處去經中道過去心
不可得現在心不可得未來心不可得未審
上座點那箇心師無語徑往龍潭曰又嚮龍
潭及乎到來潭又不見龍又不現潭曰子親

到龍潭師無對遂止息焉一夕侍立次潭曰
更深何不下去珍重便出却回曰外面黑潭
點紙燭度與師接得潭便吹滅師大悟便禮
拜潭曰子見箇什麼師曰從今向去更不疑
天下老和尚舌頭至來日潭陞座謂衆曰可
中有箇漢牙如劍樹口似血盆一棒打不回
頭他日向孤峯頂上立吾道夫在師遂將疏
鈔堆法堂前舉火云窮諸玄辯若一毫置於
太虛竭世樞機似一滴投於巨壑遂焚之於

是禮辭直抵瀉山挾襖子上法堂從東過西
從西過東顧視方丈曰有麼有麼山坐不顧
師曰無無便出至門首乃曰雖然也不得草
草遂具威儀再入相見纔跨門提起坐具曰
和尚山擬取拂子師便喝拂袖而出至晚問
首座今日新到在不座曰當時背却法堂著
草鞋出去也山曰此子已後向孤峯頂上盤
結草菴呵佛罵祖去在師一日齋遲自扞鉢
過堂時雪峯爲典座曰鐘未鳴鼓未響扞鉢

甚處去師便歸方丈峯舉似岩頭頭曰大小
德山未會未後句師聞令侍者請巖至謂曰
汝不肯老僧那巖密啓其意次日上堂便與
尋常不同巖於僧堂前撫掌曰且喜堂頭老
漢會未後句雖然也只得三年後三年果遷
化示衆曰汝但無心於事無事於心自然虛
而靈空而妙若毫端許言之本末者皆爲自
欺何故毫釐繫念三途業因瞥尔情生萬劫
羈鎖聖名凡號揔是虛聲殊相劣形皆爲妄

色汝欲求之得無累乎及其厭之又成大患
終無所益雪峯問師從上宗乘事某甲還有
分也無師曰道甚麼峯有省廊侍者問從上
諸聖向其處去師曰作麼作麼廊曰勅點飛
龍馬跋鱉出頭來師休去來日浴出廊度湯
與師師撫背云昨日公案如何廊曰者老漢
今日方始瞥地師休去師一日同瓦棺入山
斫木師將一椀水與棺棺接得便喫師曰會
麼棺曰不會師又將一椀水與棺棺接得又

喫師曰會麼棺曰不會師曰何不成禪取不
會底棺曰不會又成禪箇什麼師曰子大似
箇鐵橛師隔江見高亭云不審師乃搖扇招
之高亭開悟便橫趨而去師九生院圻却佛
殿獨存法堂而已

贊曰 擔鈔走南方 擔滅諸魔子

逢臭老婆點出三心

看小當仁啞無一語

龍潭吹滅紙燭 破蕩家財

德嶠盤結草菴 呵罵佛祖

到瀉山背著草鞋出 活弄目前機

問巖頭不肯老僧那 會得末後句

虛而靈空而妙 逢人拋擲爛泥團

毛吞海芥投針 對衆拗折金剛杵

鱉鼻蛇毒因宗乘事入心

飛龍馬驟向作麼中馳步

斫木要瓦棺成襖便休

搖扇喜高亭橫趨而去

誠所謂圻佛殿咬猪狗不近人情底老尊慈
想不是花錦地戀繁華央庠底座主

巖頭齋禪師

師諱全齋嗣德山泉州人姓柯氏一日參山
方跨門便問是凡是聖山便喝師禮拜有僧
舉似洞山山曰若不是齋公大難承當師曰
洞山老人不識好惡錯下名言我當時一手
擡一手搦一日與雪峯欽山聚話次見一椀
水欽曰水清月現峯曰水清月不現師踢而

去師與雪峯同辭德山山問甚處去師曰暫
離和尚去山曰子他後作麼生師曰不忘和
尚曰子憑何有此說師曰豈不聞智與師齊
戒師半德智過於師方堪傳授曰如是如是
善自護持師在鄂州巖頭值沙汰於湖邊作
渡子兩岸各掛一板有人過渡打板一下師
曰阿誰曰要過那邊去師乃舞棹迎之一日
因婆子抱一子來乃曰呈橈舞棹即不問且
道婆子手中兒甚處得來師便打婆曰婆生

七子六箇不遇知音只者一箇也不消得便
拋向水中師後菴于洞庭卧龍山徒侶臻集
僧問無師還有出身處也無師曰聲前古毳
爛上堂云吾嘗究涅槃經七八年於中有一
兩段義似衲僧說話又云休休時有僧出作
禮云請和尚爲衆舉師遂云吾教意如六字
三點第一向東方下一點點開諸菩薩眼第
二向西方下一點點諸菩薩命根第三向上
方下一點點開諸菩薩頂門此是經中第一

段義吾教意如摩醯首羅擘開面門豎亞一
隻眼此是第二段義吾教意如塗毒鼓擊一
聲遠近聞者俱喪此是第三段義時小巖上
座問如何是塗毒鼓師以兩手按膝亞身曰
韓信臨朝底嚴無對羅山謁石霜問去住不
寧時如何霜曰直須盡却山不恁意乃參師
問同前語曰從他去住管他作麼遂服膺一
日又問曰和尚豈不是三十年前在洞山而
不肯洞山曰是又曰和尚豈不是嗣德山而

不肯德山曰是曰不肯德山則不問只如洞
山有何虧缺師良久曰洞山好佛只是無光
山禮拜師問僧甚處來曰西京來師曰黃巢
過後還收得劔麼曰收得師近前引頸云因
僧曰師頭落也師呵呵大笑僧後到雪峯峯
問甚處來曰巖頭來曰巖頭有何言句僧舉
前話峯打三十棒趁出僧問如何是道曰破
草鞋拖向湖邊著僧問古帆未掛時如何曰
小魚吞大魚曰掛後如何曰後園驢喫草瑞

巖問如何是本常理師云動也曰動時如何
曰不是本常理巖沈思師曰肯則未脫根塵
不肯則永沈生死巖於言下頓悟後凡有問
佛問法問禪問道皆作噀聲一日謂眾曰老
漢去時大叫一聲了去一日賊大至責以無
供饋遂刺刃焉師神色自若大叫一聲而終
聞數十里唐光啓三年四月八也
贊曰 智過師 誰信你
遭一喝大難承當 用一噀全沒巴鼻

橫點頭三十載 謂洞山佛無光
搥塗毒一兩聲 聽韓信臨朝底
舞棹洞庭湖畔 引臭老婆拋却兒
阻雪鰲山店頭 呵魔頭僧去打睡
聲前古毳爛 謾當機籌
後園驢喫草 是何宗旨
劔從收後嬰鋒去 錯付者僧頭
鐘未鳴時拈鉢回 密啓先師意
問大道端倪處 急須颺下草鞋

與同行共話閒 可惜踢翻椀水

謂羅山從他去住 未有不寧時

肯瑞巖未脫根塵 不是本常理

生平脫洒視生死如游戲園林末後大叫一聲聞數十里

雪峯真覺禪師

師諱義存泉州曾氏子出嶺首謁壩官三到
投子九上洞山因緣不契後參德山遂悟於
言下師辭洞山山問子向甚麼處去師云歸

嶺去山云當時從甚路出師云飛猿嶺出山
云今從甚路去師云飛猿嶺去山云有一人
不從飛猿嶺去子還識麼師云不識山云爲
甚麼不識師云他無面目山云子既不識爭
知無面目師無對師同巖頭到澧州鰲山店
阻雪頭唯打睡師一向坐禪一日喚巖曰師
兄起來巖曰作麼師曰今生不著便共文遠
箇漢行脚到處被他帶累師兄如今又只管
打睡巖喝云嚏眠去每日恰似七村裏土地

他時後日魔魅人家男女去在師點胸云某甲這裏未穩在巖曰將謂你他後向孤峯頂上盤結草庵呵佛罵祖去在猶作者箇語話師曰我實未穩在巖曰若實如此據汝見處一一通來是處與你證明不是處與你剗却師曰我初到壩官聞舉名空義得箇入處巖曰此去三十年切忌舉著師曰又因洞山過水悟道頌有箇省處岩曰若恁麼自救也不了師云某甲因問德山從上宗乘中事學人

還有分也無山打一棒云道甚麼我當下如桶底脫相似被巖頭震威一喝云豈不聞道從門入者不是家珍師曰如何即是巖曰他後若欲播揚大教須一一從自己胸襟流出將來與我蓋天蓋地去師於言下大悟連聲叫曰師兄今日始是鰲山成道師行腳時參烏石觀纔敲門觀問誰曰鳳凰兒曰來作麼曰來啗老觀觀便開門搗住曰道道師擬議觀托開閉却門師生入院後示衆曰我當時若

入得老觀門你者一隊噎酒糟漢向甚處摸
索上堂南山有一条鱉鼻蛇汝等諸人切須
好看時長慶出云今日堂中大有喪身失
命雲門以拄丈攔向面前作怕勢僧舉似玄
沙沙云須是稜兄始得然雖如是我即不然
僧云和尚作麼生沙云用南山作麼上堂盡
大地撮來如粟米粒大拋向面前漆桶不會
打鼓普請看玄沙一日謂師曰某甲如今大
用去和尚作麼生師將三箇木毬一時輓出

沙作斫牌勢師曰你親在靈山方得如此沙
曰也是自家事闍師施銀交床僧問和尚受
大王如此供養將何報答師以手托地曰輕
打我師象骨巖接人後欲往松山建寺安衆
問大師借庵基尼不肯因與坐禪約曰未滿
七日出定者輸尼至六日開眼師遂奪其基
建寺師親書牌於磨院云山前竟日無狼虎
磨下終年絕雀兒至今虎雀絕無
贊曰 得處頗辛勤 用時無巧妙

入飛猿嶺不識一人
生蠱毒鄉寧無少過

焦磚打著連底凍
就德山點發不假多談
赤眼撞著火柴頭
與巖頭同行只消一箇

鰲山店頭成道
半夜發狂

象骨巖下蹀跟
全身放倒

圓木毬輓出
玄沙火急作牌

鱉鼻虵攏來
雲門郎忙打草

開門輕擬議
被老觀搗住非鳳凰兒

打鼓普請看
盡大地撮來如粟粒大

千七百人善知識
盡從杓頭上舀來

五六十里雪峯山
只向蒲團頭奪了

松山小塔外石子
亂疊幾層

古澗寒泉牛蹄滴
能深多少

山前竟日無狼子
且德老僧行

磨下終年絕雀兒
不愁齋米耗

一生受大王供養
何以報恩手托地疾呼輕

打我輕打我

Seal impression in seal script (Zhuanshu) characters, likely a collector's or library's seal.

Faint, ghosted text visible through the paper, likely bleed-through from the reverse side of the page. The text is arranged in vertical columns within a rectangular border.

Text on the right edge of the page, possibly a title or page number, partially obscured by the binding.

